

四庫全書

史部

欽定四庫全書

欽定續通典卷七十

禮
賓

天子受諸侯遣使來聘

宋

遼

金

元

明

臣等謹按杜佑通典所徵天子受諸侯遣使來聘皆殷周封建諸侯之制故佑自注謂三代而下並無其禮是也惟攷外蕃遣使來聘之儀自唐開元禮外見於宋史禮志遼金禮志及明史禮志集禮諸書

尤為詳備則昔所無而後所有者今亦不得而遽
削之也第宋與契丹約為兄弟凡信使往來如古
諸侯交聘非蕃國比其通金也亦用契丹故事暨
建炎南渡奉表稱臣訖於金亡未嘗一日正敵國
之禮也史臣所書自多隱諱然則南北通書等於
蕃國聘使豈實錄哉但既無類例可歸採其儀注
附見此條下差有倫脊故并著其說如右

宋太祖建隆元年八月三日宴近臣於廣政殿江南吳

越朝貢使皆預開寶四年十一月五日江南李煜吳越
錢俶各遣子弟來朝宴於崇德殿真宗景德澶淵會盟
之後始有契丹國信使副元正聖節朝見其入聘儀注
前一日習儀於驛是日皇帝御崇德殿宰臣樞密使以
下大班起居訖至員僚起居後館伴使副一班入就位
東面立次接書匣閣門使升殿立次通事入不通唱拜
兩拜奏聖躬萬福又唱兩拜隨呼萬歲唱祇候赴東西
接引使副位舍人引契丹使副自外捧書匣入當殿前

立天武官擡禮物分東西向入列於殿下以東為上舍人唱天武官起居兩拜隨呼萬歲奏聖躬萬福唱各祇候閣門從東階降至契丹使位揖使跪進書匣閣門側身搢笏跪接舍人受之契丹使立閣門執笏捧書匣升殿當御前進呈訖授內侍都知都知拆書以授宰臣宰臣樞密進呈訖遂擡禮物出舍人與館伴使副引契丹使副至東階下閣門使下殿揖引同升立御前至國信大使傳國主問聖體通事傳譯舍人當御前鞠躬傳奏

訖揖起北使皇帝宣閣門迴問國主北使跪奏舍人當

御前鞠躬奏訖遂揖北使起却引降階至辭見位面西

揖躬舍人當殿通北朝國信使某官某祇候見應喏絕

引當殿唱拜大起居

其拜舞並依本國禮

出班謝面天顏歸位唱

拜舞蹈訖又出班謝沿路驛館御筵茶藥及傳宣撫問

復歸位唱拜舞蹈訖舍人宣有勅賜窄衣一對金蹀躞

子一金塗銀冠一鞞一兩衣著三百匹銀二百兩鞍轡

馬一

每句應喏

跪受起拜舞蹈訖唱祇候應喏西出

凡傳語并奏聖

躬萬福致辭並通事傳譯舍人當殿鞠躬奏聞後同此

次通北朝國信副使某官

某祇候見其拜舞謝賜致詞並如上儀西出

其勅賜衣一對腰帶

一幘頭靴笏衣著二百匹銀器一百兩鞍轡馬一

次通事及舍人引舍人已下

分班入不通使引合班贊唱大起居拜舞如儀舍人唱有勅賜衣服束帶衣著銀器分物應喏跪授擡擔床跪起舞蹈拜訖唱各祇候分班引出次引差來通事以下從人分班入不通使引合班唱兩拜奏聖躬萬福又拜隨呼萬歲唱有勅各賜衣服腰帶衣著銀器分物應喏

跪授起喝兩拜隨拜萬歲唱各祇候唱喏分班引出次
行門殿直入起居訖殿上侍立文明殿樞密直學士三
司使內客省使下殿舍人合班奏報閣門無事唱喏訖
卷班西出客省閣門使以下東出其排立供奉官已下
橫行合班宣徽使殿上喝供奉官已下各祇候分班出
並如常儀皇帝降坐還內宴日契丹使副已下服所賜
承受引赴長春殿門外并侍宴臣僚宰執親王樞密使
以下祇候俟長春殿諸司排當有備閣門使附入內都

知奏班齊皇帝坐鳴鞭宰臣親王以下並宰執分班舍人引入其契丹使綴親王班入舍人通某甲以下唱喏班首奏聖躬萬福唱各就坐兩拜隨呼萬歲唱就坐分班引上殿或皇帝撫問契丹使副舍人便引下殿唱兩拜如禮唱各就坐次舍人通事分引錫哩以下東西分班兩拜唱就坐分引赴兩廊下次舍人引差來通事從人東西分班入合班唱兩拜如禮唱就坐分引赴兩廊次唱教坊已下兩拜班首奏聖躬萬福又唱

拜兩拜如禮唱各祇候次引肴盞二人稍近前唱拜兩
拜如禮唱上殿祇候分東西班上殿立有司進茶床內
侍酌酒訖閣門使殿上御前鞠躬奏某甲以下進酒餘
如常儀宴起宰臣以下降階舍人唱兩拜搢笏舞蹈唱
各祇候分班出次錫哩合班唱兩拜舞蹈三拜拜謝訖
唱各祇候分班出次通事從人合班唱兩拜如禮唱各
祇候分班引出次唱教坊使以下兩拜如禮唱各祇候
如傳宣賜茶酒又唱謝茶酒拜兩拜如禮唱各祇候出

閣門使殿上近前側奏無事皇帝降坐鳴鞭還內辭日
皇帝坐內殿起居班欲絕諸司排當有備催合侍宴臣
僚東西相向班立崇德殿庭俟奏班齊舍人唱拜東西
班殿侍兩拜奏聖躬萬福唱各祇候次舍人通館伴使
副某甲已下常起居次通契丹使某甲常起居次通副
使某甲常起居俱引起赴西面立次通宰臣以下橫行通
某甲以下應喏奏聖躬萬福唱各就坐應喏兩拜呼萬
歲分升殿東西向立次通事舍人引契丹錫哩以下次

差來通事從人俱分班入當殿兩拜奏聖躬萬福唱各就坐兩拜呼萬歲分引赴兩廊立次通教坊使看盞及進茶床酌酒并閣門奏進酒並如長春宴日之儀酒五巡起宰臣以下下降階班立兩拜搥笏舞蹈三拜唱各祇候宰臣以下並三司使文明殿學士樞密直學士升殿侍立其餘臣僚並契丹使並出次引錫哩及差來從人俱兩拜呼萬歲分班引出如傳宣賜茶酒更唱謝拜如前儀已上班絕舍人再引契丹使人西面揖躬舍人當

殿通北朝國信使某祇候辭通訖引當殿兩拜出班致
辭歸位又兩拜訖宣有勅賜跪受拜舞訖喝好去遂引出
次引副使致辭受賜拜舞如前儀次引錫哩以下次引
差來通事從人俱分班入舍人唱有勅賜衣服衣著銀
器分物各應喏跪受候擡擔床絕就拜起又兩拜萬歲
唱好去分班引出其使副各服所賜再引入當殿兩拜
萬歲訖唱祇候引升殿當御前立皇帝宣閣門使授旨
傳語國主舍人揖國信使跪閣門使傳旨通譯訖揖國

信使起立閤門使御前搢笏於內侍都知處奉授書匣
舍人揖國信使跪閤門使跪分付訖揖起下殿西出政
和詳定五禮有紫宸殿大遼使朝見儀紫宸殿正旦宴
大遼使儀紫宸殿大遼使朝辭儀崇政殿假日大遼使
朝見儀崇政殿假日大遼使朝辭儀其紫宸殿赴宴遼
使副位御座西諸位上將軍之南夏使副在東朶殿並
西向北上高麗交趾使副在西朶殿並東向北上遼使
錫哩從人各在其南夏使從人在東廊錫哩之南諸蕃

使副首領高麗交趾從人溪峒衙內指揮使在西廊錫哩之南又至各就位有分引兩廊班首詣御坐進酒樂作贊各賜酒羣官俱再拜就坐酒五行皆作樂賜華皇

帝再坐赴宴官行謝華之禮

按政和五禮有紫宸殿大遼使朝見儀其陳設前期

殿中監帥其屬尚舍張設紫宸垂拱殿門之內設御座於殿上當中南向尚醞設御酒尊酒器於垂拱殿御座之東尚食設御茶床於御座之西俱稍北有司設羣官酒尊酒器於垂拱殿下又設羣公座三公左輔右弼太宰少宰在御座之東稍南知樞密院事門下中書侍郎尚書左右丞同知樞密院事在其東次觀文殿大學士太子三少觀文殿學士資政殿大學士六曹尚書翰林學士承旨翰林學士資政端明殿學士閣學士左

右散騎常侍又開封尹六曹侍郎直學士閤學士又在
其東太子三師在樞密之南御史大夫在散騎常侍之
南中丞在直學士之南並西向北上親王使相在御座
之西稍南太尉在其西次節度觀察留後觀察使又在
西大遼使副在節度使之南錫哩從人分位於兩廊其
日尚輦陳輿輦於紫宸東西朵殿織扇於階下尚書兵
部列黃麾角仗及殿中細仗於紫宸殿其起居垂拱殿
皇帝將出宮讀奏目官以下橫行立定如參儀東上閤
門附內侍進班齊牌皇帝出宮行門禁衛諸班親從迎
駕自贊常起居皇帝服黃袍坐鳴鞭讀奏目官以下常
起居次知內侍省事以下次御前忠佐馬步軍頭以下
次殿前都指揮使至諸軍副指揮使次駙馬都尉次殿
前司諸軍員僚次宗室將軍以下各逐班先面西立俟
班橫行起居次行門指揮使起居俟舍人南階下置身
奏班絕皇帝降座鳴鞭詣紫宸殿後幄排立諸班親從
迎駕自贊常起居初垂拱起居班將軍紫宸殿樞密以

下大班入各就位並如望參儀舍人稱傳警四色官趨赴殿庭稱警東上閣門附內侍進班齊牌皇帝御紫宸殿坐鳴鞭平輦逍遙下應奉人采殿階下迎駕自贊常起居訖升赴平輦逍遙下立舍贊執仗人四再起居次宣贊舍人揖樞密以下躬興對立舍人並北向通班起居訖再鳴鞭樞密以下分東西升殿侍立知客省事以下庭東侍立次東上閣門官引親王就位揖躬退次侍衛親軍馬步軍都指揮使至諸軍副指揮使次開府儀同三司次馬步軍員僚三公以下百官門外序班立先殿中侍御史入側宣大起居訖分班復覺察位舍人二員各立其後知客省事以下退立東階下對立舍人退立西階下宣贊舍人退近當南庭中立次舍人分引兩省官入次東上閣門官舍人詣門外引班首以下分東西入殿庭東西相向立定東上閣門官揖躬贊舍人當殿通宰臣姓名以下起居東上閣門官引班首以下橫行北向並如望參儀宣贊舍人揖左班近前自班後東

階下立贊拜東上閣門官揖班首以下躬大起居東上
閣門官揖宰相執政官升殿宣贊東上閣門官復侍立
位引右班舍人由右班前出餘官分出殿中省押仗官
復押仗位次兩省官出次殿中侍御史對揖出知客省
事以下復侍立位贊宣對立舍人各復位次館伴官入
側宣大起居訖接書傳語知客省事官升殿引國信使
副自外捧書匣入舍人承受引天武舉禮物分東西入
國信使副堂殿立接書知客省事官降階至國信使前
舍人揖國信使稍前跪進書匣知客省事官側身搢笏
跪接出笏起揖國信使復位立知客省事官執笏捧書
匣升殿暫授入內省官知客省事官搢笏捧至御座前
進呈退復授入內省官天武常起居入內省官發匣取
書傳三省與樞密同進讀殿下引禮物出殿東偏門進
書訖付入內省官各復侍立位舍人與館伴副使引國
信使副至殿東階下傳語知客省事官降階揖同升殿
國信使當新檻北向立舍人揖國信使稍前跪傳大遼

國主問聖體傳事譯授舍人舍人當國信使班前躬奏
訖揖起復位立知客省事官詣御座前躬承旨近國信
使班前西向立具宣問授傳事舍人揖國信使稍前跪
傳事譯授訖具回奏譯授舍人舍人當班前躬奏如初
揖起復位引降東階對見辭位西向立揖躬舍人側宣
引當殿大起居班首出班謝面天顏履位五拜又出班
謝沿路館驛茶樂御筵傳宣撫問復位五拜宣有勅各
等第賜對衣衣著銀器鞍轡馬跪受賜起五拜西出次
舍人傳事引錫哩分入當殿合班大起居宣有勅各等
第賜衣服束帶衣著銀器分物跪受賜起五拜分出次
舍人傳事引從人入當殿合班四拜起居奏聖躬萬福
宣有勅各等第賜衣服腰帶衣著銀器分物跪受賜訖
再拜分出次樞密直學士下殿出舍人合班躬奏閣門
無事班班西出皇帝降座鳴鞭知客省事以下排立使
臣並卷班出舍人當殿承旨傳四色官趨赴殿庭稱奉
勅放仗押仗官再拜訖退其宴國信使以下服所賜衣

帶錫哩從人垂拱殿門外階下立赴宴官韡笏同國信
使副屏門外分東西南向立諸司排當備俟內排傳立
東上閣門附內侍奏班齊皇帝出宮鳴鞭行門禁衛諸
班親從迎駕奏聖躬萬福皇帝即御座殿中監以下知
客省事以下知內侍省事以下帶御器械官二人尚局
應奉官祇應武功大夫以下闕班各奏聖躬萬福次管
軍目僚奏聖躬萬福各復侍立祇應位次舍人引赴宴
官并國信使副依東西座位入當殿立定奏聖躬萬福
訖贊各就座再拜贊就座舍人分引升殿席前相向次
引錫哩次從人並分入當殿贊各就座再拜贊就座分
引升座訖次教坊使以下通班四拜起居次肴殽人謝
升殿再拜內侍進御茶床殿侍酌酒訖東上閣門官詣
御座前躬奏班首姓名以下進酒舍人分引殿上臣僚
橫行北向贊再拜舍人引班首稍前東上閣門官接引
詣御座東北向搢笏殿中監奉盤殽接首奉御啟殽班
首西向立殿中少監以酒注於殽班首捧酒詣御座前

躬進訖虛跪興以盤授殿中監出笏東上閤門官引退舍人接引復位贊再拜舍人引班首稍前殿上臣僚席前相向立東上閤門官接引班首詣御座前北向搢笏殿中監授盤捧詣御座前西向立作樂皇帝飲訖舍人分引臣僚橫行東上閤門官引班首接璣訖少退虛跪興授殿中監出笏引退舍人接引復位贊再拜舍人贊各賜酒羣官再拜贊就座羣官俱立席後復贊就座羣官俱坐酒初行羣官搢笏受酒先宰臣次百官皆作樂尚食典御奉御進食大官令設羣官食皇帝再舉酒羣官俱立席後樂作飲訖贊各就座復行羣官酒樂作第三第四第五並如第二之儀若宣示璣即隨所向東上閤門官以下揖稱宣示璣躬贊就座若宣勸即立席後躬飲訖贊再拜內侍舉御茶床舍人引班首以下降階橫行再拜搢笏舞蹈又再拜分班出次錫哩五拜次從人再拜並分出次教坊謝祇應並再拜如賜茶酒殿中監以下知客省事以下知內侍省事以下帶御器械官

次尚局應奉官祇應武功大夫以下次行門禁衛諸班
親從教坊逐班贊謝茶酒再拜東上閣門官殿上側奏
無事皇帝降座鳴鞭與此大同小異徽宗宣和元年金使李善慶等來遣

直秘閣趙有開偕善慶等報聘已而金使復至用新羅
使人禮引見宣政殿徽宗臨軒受使者書自後屢遣使
來帝待之甚厚時引上殿奏事賜予不貲禮遇並用契
丹故事高宗紹興三年十二月宰臣進呈金使李永壽
等正旦入見故事百官俱入上曰金盛之時神京會同
朝廷之尊百官之富所以夸示今暫駐於此事從簡便

舊日禮數豈可盡行無庸俱入使人見辭並賜食於殿
門外八年金國遣使副來就驛議和詔王倫就驛賜宴
十一年十一月金國遣審議使來入見時殿陛之儀議
猶未決議者謂兵衛單弱則非所以隆國體欲設仗衛
恐駭敵情乃設黃麾仗千五百人於殿廊蔽以帟幙班
定徹帷十二年扈從徽宗梓宮皇太后使副來十三年
十一月有司言賀正旦使初至於盱眙軍賜宴未審回
程合與不合筵待詔內侍省差使臣二員沿路賜宴一

員於平江府一員於鎮江府一員於盱眙軍尋詔金國
賀正旦人使到闕赴宴等坐次合與宰臣相對稍南使
副上下馬於執政官上下馬處三節人從並於宮門外
上下馬立班則於西班與宰臣相對立仍權移西班使
相在東壁宰臣之東十四年正月一日宴金國人使於
紫宸殿文臣權侍郎以上武臣刺史以上赴坐自後正
旦賜宴倣此五月金國始遣賀天申節使來有司言合
照舊例北使賀生辰聖節使副隨宰臣紫宸殿上壽進

壽酒畢皇帝宰臣以下同使副酒三行教坊作樂三節
人從不赴既而三節人從有請乞隨班上壽詔許之仍
賜酒食遇賀正人使朝辭在上辛祠官致齋之內仍用
樂二十九年以皇太后崩其賀正使副止就驛賜宴見
辭日賜茶酒並不舉樂大率北使至闕先遣伴使賜御
筵於班荆館在赤岸去府五十里酒七行翼日登舟至北郭稅亭
茶酒畢上馬入餘杭門至都亭驛賜褥被鈔鑼等明日
臨安府書送酒食閤門官八位具朝見儀投朝見膀子

又明日入見伴使至南宮門外下馬北使至隔門內下
馬皇帝御紫宸殿六參官起居北使見畢退赴客省茶
酒遂宴垂拱殿酒五行惟從官已上預坐是日賜茶器
名果又明日賜生餼見之二日與伴使階往天竺燒香
上賜沉香乳糖齋筵酒果次至冷泉亭呼猿洞而歸翼
日賜內中酒果風藥花餉赴守歲夜筵酒五行傀儡正
月朔旦朝賀禮畢上遣大臣就驛賜筵中使傳旨宣勸
酒九行三日客省僉賜酒食內中賜酒果遂赴浙江亭

觀潮酒七行四日赴玉津園燕射命諸校善射者假管軍觀察使伴之上賜弓矢酒行樂作伴射官與大使並射弓館伴副使並射弩酒九行退五日大宴集英殿尚書郎監察御史以上皆預學士撰致語六日朝辭退賜襲衣金帶大銀器臨安府書送儘儀復遣執政官就驛賜宴晚赴解換夜筵伴使與此使皆親勸酬且以衣物為侑次日加賜龍鳳茶金鍍合乘馬出北關門登舟宿赤岸又次日復遣近臣押賜御筵自到闕朝見射朝辭

共賜大使金千四百兩副使金八百八十兩衣各三襲
金帶各三條都管上節各賜銀四十兩中下節各三十
兩衣一襲塗金帶一條使人到闕筵宴凡用樂人三百
人百戲軍七十人築毬軍三十二人起立毬門行人三
十二人旗鼓四十人並下臨安府差相撲一十五人於
御前等子內差並前期教習之

按宋志夏國進奉使見
辭儀夏國歲以正旦聖

節入貢元豐八年使來詔夏國見辭儀制依嘉祐八年
見於皇儀殿門外朝辭詣垂拱殿政和新儀夏使見日
俟見班絕謝班前使奉表函引入殿庭副使隨入西向
立舍人揖躬舍人當殿躬奏夏國進奉使姓名以下祇

候見引當殿前跪進奉表舍人受之副入內侍省官進
呈使者起歸位四拜起居舍人宣有勅賜某物兼賜酒
饌跪授箱過俯伏興再拜舍人曰各祇候揖西出次從
人入不奏即引當殿四拜起居舍人宣賜分物兼賜酒
食跪受箱過俯伏興再拜舍人曰各祇候揖西出辭日
引使副入殿庭西向立舍人揖躬舍人當殿躬奏夏國
進奉使姓名以下祇候辭引當殿四拜宣賜某物酒饌
再拜如見儀凡蕃使見辭同日者先夏國次高麗次交
趾次海外蕃客次諸蠻○高麗進奉使見辭儀見日使
捧表函引入殿庭副使隨入西向立舍人鞠躬當殿前
通高麗國進奉使姓名以下祇候見引當殿使稍前跪
進表函俯伏興訖歸位大起居班首出班躬謝起居歸
位再拜又出班謝面天顏沿路館券都城門外茶酒歸
位再拜揖筭舞蹈俯伏興再拜舍人宣有勅賜某物兼
賜酒食揖筭跪授箱過俯伏興再拜舍人曰各祇候揖
西出次抑物以下入不通即引當殿四拜起居宣有勅

賜某物兼賜酒食跪受箱過俯伏興再拜起居舍人曰
各祇候揖西出辭日引使副入殿庭西向立舍人揖躬
舍人當殿躬通高麗進奉使姓名以下祇候辭引當殿
四拜起居班首出班致詞歸位再拜舍人宣有勅賜某
物兼賜酒食搢笏跪授箱過俯伏興再拜舍人曰好去
揖西出次從人入辭如儀政和元年詔高麗在西北二
國之間自今可依熙寧十年指揮隸樞密院明年入貢
詔復用熙寧例以文臣充接伴使副仍往還許上殿七
年賜以籩豆各十二簠簋各四登一銅二鼎二壘洗一
尊二銘曰惟爾令德孝恭世稱東蕃有來顯相余一人
嘉之用錫爾寶尊以寧爾祖考子子孫孫其永保之紹
興二年高麗遣使副來貢並賜酒食於同文館其交州
宜州黎州諸國見辭並如上儀唯筵勞宴賚之數則有
殺焉其授書皆令有司付之又西蕃嘉勒氏西南諸
蕃占城回鶻大食于闐三佛齊印部川蠻及溪峒之屬
或比間數歲入貢層檀日本大理注輦蒲甘龜茲佛泥

拂菻真臘羅殿渤泥邈黎闍婆州眉沱諸國入貢或一再或三四不常至注輦三佛齊使者至以真珠龍腦金蓮花等登陛跪散之謂之撒殿元祐二年知穎昌府韓縝言交趾小國其使人將及境臣嘗近弼難以抗禮按元豐中迺以兵官餞以通判使副詣府其犒設令兵官主之請如故事仍詔所過郡凡前宰相執政官知判者亦如之又詔立回賜于闐國信分物法歲遣貢使雖多止一如則又命于闐國使以表章至則問歲聽一入貢餘令於熙秦州貿易禮部言元豐著令西南五姓蕃每五年許一貢今西蕃秦平軍入貢期限未及詔特許之學士院言諸蕃初入貢者請令安撫鈐轄轉運等司體問其國所在遠近大小與見今入貢何國為此保明聞奏庶待遇之禮不致失當宣和詔蕃國入貢令本路驗實保明如涉詐偽以上書詐不實論建炎三年占城國王遣使進貢適遇大禮遂加恩特授檢校少傅加食邑自後明堂郊祀並倣此紹興二年占城國王遣使貢沉

香犀象玳瑁等皆以綾錦銀絹建炎四年南平王薨差
廣南西路轉運副使尹東珣充弔祭使賜絹布各五百
疋羊酒寓錢寓絲寓金銀等就欽州授其國迎接人制
贈侍中進封南越王封其子為交趾郡王遇大禮並加
恩如占城國王淳熙元年賜安南國王印銅鑄塗以金
紹興七年三佛齋國乞進章奏赴闕朝見詔許之令廣
東經略司酌量只許四十人到闕進貢南珠象齒龍涎
珊瑚琉璃香藥詔補保順幕化大將軍三佛齋國王給
賜鞍馬衣帶銀器賜使人宴於懷遠驛淳熙五年再入
貢計其直二萬五千緡回賜綾錦羅絹等物銀二千五
百兩紹興三十一年正月安南獻馴象帝曰蠻荒貢方
物乃其職但朕不欲以異獸勞遠人其令帥臣告諭自
今不必以馴象入貢三十二年孝宗登極詔曰比年以
來累有外國入貢太上皇帝冲謙弗受况朕涼菲又何
以堪自今諸國有欲朝貢者令所在州軍以理諭遣毋
得以聞淳祐三年安南國王陳日照來貢加賜功臣號

十一年再來貢景定三年六月日照上表貢獻乞授其位於其子陳威晃咸淳元年二月加安南大國王陳日熙功臣增安善二字安南國王陳威晃功臣增守義二字各賜金帶鞍馬衣服二年復上表進貢禮物賜金五百兩賜帛一百

足降詔嘉獎

遼制高麗使入見臣僚常服起居應上殿臣僚殿上序立閤門奏膀子引高麗使副面殿立引上露臺拜跪附奏起居訖拜起立閤門傳宣王詢安否使副皆跪大使奏臣等來時詢安引下殿面殿立進奉物入列置殿前控鶴官起居畢引進使鞠躬通高麗國王詢進奉宣徽

使殿上贊進奉赴庫馬出擔床出畢引使副退面西鞠躬舍人鞠躬通高麗國謝恩進奉使某官某以下祇候見舞蹈五拜不出班奏聖躬萬福再拜出班謝面天顏五拜出班謝遠接湯藥五拜贊各祇候使副私獻入列置殿前控鶴官起居引進使鞠躬通高麗國謝恩進奉使某官某以下進奉宣徽使殿上贊如初引使副西階上殿序立皇帝不入御牀臣僚伴酒契丹舍人通漢人閤使贊再拜稱萬歲各就坐酒三行殺膳二味若宣令

飲盡就位拜稱萬歲贊各就坐餽膳不贊起再拜稱萬歲引下殿舞蹈五拜贊各祇候引出於幕次內別差使臣伴宴起宣賜衣物訖遙謝五拜畢歸館具曲宴高麗使儀臣僚入朝班齊皇帝升殿宣徽教坊控鶴文武班起居皆如常儀謝宣宴贊各上殿祇候契丹臣僚謝宣宴勾高麗使入面南鞠躬舍人鞠躬通高麗國謝恩進奉使某官某以下起居謝宣宴共十二拜贊各上殿祇候臣僚使副就位立大臣進酒契丹舍人通漢人閤使贊

上殿臣僚皆拜贊各祇候進酒大臣復位立贊應坐臣僚拜贊各就坐行酒若宣令飲盡贊再拜贊各就坐教坊致語臣僚皆起立口號絕贊再拜贊各就坐凡拜皆稱萬歲曲破臣僚起下殿契丹臣僚謝宴中書令以下謝宴畢引使副謝七拜贊各好去控鶴官門外祇候報閤門無事供奉官捲班出來日問聖體其高麗使朝辭儀臣僚起居上殿如常儀閤門奏高麗使朝辭膀子起居應闕如儀贊各上殿祇候引西階上殿立契丹舍人

贊拜稱萬歲贊各就坐中書令以下伴酒三行殺膳二
味皆如初見之儀既謝贊有勅宴五拜贊各好去引出
於幕次內別差使臣伴宴畢賜衣物跪受遙謝五拜歸
館西夏國進奉使朝見臣僚常朝畢引使者左入至丹
墀面殿立引使者上露臺立揖少前拜跪附奏起居訖
俯伏興復位閣使宣問某安否鞠躬聽旨跪奏某安俯
伏興退復位引左下至丹墀面殿立禮物右入左出畢
閣使鞠躬通某國進奉使姓名候見共一十七拜贊祇

候平立有私獻過畢揖使者鞠躬贊進奉收訖贊祇候
引左上殿就位立臣僚使者齊聲喏酒三行引使左下
至丹墀謝宴五拜畢贊有勅宴五拜祇候引右出禮畢
於外賜宴客省伴宴仍賜衣物其西夏使朝辭常朝畢
引使者左入通某國某使祇候辭再拜不出班起居再
拜出班戀闕致詞復再拜賜衣物謝恩如常儀若賜宴
五拜畢贊好去引右出

金制外國使入見皇帝即御座鳴鞭報時畢殿前班小

起居畢至侍立位引臣僚左右入丹墀小起居引宰執上殿其餘臣僚分班出閣門使奏使者入見膀子先引宋使副出笏捧書左入至丹墀北向立閣使左下接書捧書者單跪授書拜起立閣使左上露階右入欄內奏封全轉讀畢引使副左上露階齊揖入欄內揖使副鞠躬使少前拜跪附奏畢拜起復位立待宣問宋皇帝時並鞠躬受勅旨再揖鞠躬使少前拜跪奏畢起復位齊退却引使副左下至丹墀北向立禮物右入左出盡揖

使副旁折通班再引至丹墀舞蹈五拜不出班奏聖躬
萬福再拜揖使副鞠躬使出班謝面天顏復位舞蹈五
拜再揖使副鞠躬使出班謝遠差接伴兼賜湯藥諸物
等復位舞蹈五拜各祇候引右出賜衣次引宋從人入
通名以下再拜不出班又再拜各祇候亦引右出次引
高麗使左入至丹墀北向略立引使左上露階立定揖
橫使鞠躬正使少前拜跪附奏畢拜起復位立閣使宣
問高麗王時並鞠躬受勅旨畢再揖橫使鞠躬正使少

前拜跪奏畢拜起復位齊退却引左下至丹墀面殿立
定禮物右入左出盡揖使傍折通班畢引至丹墀通一
十七拜各祇候平立引左階立次引夏使見如上儀引
右階立次再引宋使副左入至丹墀謝恩舞蹈五拜各
祇候平立次引高麗夏使並至丹墀三使並鞠躬有勅
賜酒食舞蹈五拜各祇候引右出次引宰執下殿禮畢
其曲宴儀皇帝即御座鳴鞭報時畢殿前班小起居至
侍立位引臣僚并使客左入旁折通班至丹墀舞蹈五

拜不出班奏聖躬萬福又再拜出班謝宴舞蹈五拜各
上殿祇候分引預宴官上殿其餘臣僚右出次引宋使
從人入至丹墀再拜不出班奏聖躬萬福又再拜有勅
賜酒食又再拜引左廊立次引高麗夏從人入分引左右
廊立果牀入進酒皇帝舉酒時上下侍立官并再拜接
盞畢候進酒官到位當坐者再拜坐即行臣使酒傳宣
立飲畢再拜坐次從人再拜坐至四盞餅茶入致語聞
鼓笛時揖臣使并人從立口號絕坐宴并侍立官并再

拜坐次從人再拜坐食入五盞歇宴教坊謝恩畢揖臣
使起果牀出皇帝起入閣臣使下殿歸幕次賜花人從
隨出戴花畢先引人從人左右廊立次引臣使入左右
上殿位立皇帝出閣坐果牀入坐立並再拜坐次從人
再拜坐九盞將曲終揖從人至位再拜引出聞曲時揖
臣使起再拜下殿果牀出至丹墀謝宴舞蹈五拜分引
出朝辭儀皇帝即御座鳴鞭報時畢殿前班小起居至
侍立位引臣僚分班入至丹墀小起居引宰執上殿其

餘臣僚分班出閣使奏辭膀子先引夏使左入傍折通
班畢至丹墀再拜不出班奏聖躬萬福又再拜揖使副
鞠躬使出班繼闕致詞復位又再拜唱各好去引右出
次引高麗使如上儀亦引右出次引宋使副左入傍折
通班畢至丹墀依上通六拜各祇候平立閣使賜衣馬
鞠躬聞勅再拜賜衣馬畢平身搢笏單跪受別錄物過
盡出笏拜起謝恩舞蹈五拜有勅賜酒食舞蹈五拜引
使副左上露階齊揖入欄內揖鞠躬大使少前拜跪受

書起復位揖使副齊鞠躬受傳達畢齊退引左下至丹墀鞠躬唱各好去引右出次引宰執下殿禮畢熙宗時夏使入見改為大起居定制以宋使列於三品班高麗夏列於五品班皇統二年六月定臣使辭見臣僚服色拜數止從常朝起居三國使班品如舊俟殿前班及臣僚小起居引宰執升殿餘臣分班畢乃令行人見及朝辭之禮凡入見則宋使先禮畢夏使入禮畢而高麗使入其朝辭則夏使先禮畢而高麗使入禮畢而宋使入

夏高麗朝辭之賜則遣使就賜於會同館唯宋使之賜則庭授世宗大定六年詔外國使初見朝辭則於左掖門出入朝賀賜宴則由應天門東偏門出入

元自太祖時輝和爾回鶻西夏西域高麗皆遣使入貢世祖以後安南占城雲南金齒緬國大理拂郎等國亦

皆遣使貢獻

元蕃使朝貢於正旦聖節大朝會之日隨班行禮

明太祖洪武二年定蕃國遣使進表儀所司於王宮及國城街巷結綵設闕庭於殿上正中前設表箋案又前

設香案使者位於香案東捧表箋二人於香案西設龍
亭於殿庭南正中儀仗鼓樂具備清晨司印者陳印案
於殿中滌印訖以表箋及印俱置於案王冕服衆官朝
服詣案前用印畢用黃袱裹表紅袱裹箋各置於匣中
仍各以黃袱裹之捧表箋官捧至於案引禮引王至殿
庭正中衆官位其後贊拜樂作再拜樂止王詣香案前
跪衆官皆跪三上香訖捧表官取表東向跪進王王受
表以進於使者使者西向跪受興置於案贊興王復位

贊拜樂作王與衆官皆四拜樂止禮畢捧表箋官捧表前行置於龍亭中金鼓儀仗鼓樂前導王送至宮門外還衆官朝服送至國門外使者乃行是年占城國遣陪臣虎都蠻來貢高麗遣陪臣禮部尚書洪尚載安南遣陪臣同時敏等皆貢方物既至有司奏聞出國門以迎勞擇日進表幣方物於奉天殿畢進箋及方物於中宮東宮上位遣官於會同館賜宴畢東宮復遣官禮待省府臺皆有宴將還遣使勞送出境如或常朝則中書接

授表箋方物次日使者隨班入見其宴賜上位東宮取
旨禮待今具其儀 蕃使至龍江驛驛令具某國遣使
者姓某名某及從人名數詣應天府報知應天府官稟
知中書省及禮部禮部奏聞遣侍儀舍人二人接伴遣
應天府同知龍江驛禮待前期館人陳設蕃使及應天
府官坐次於正廳賓左主右中設酒案及食案應天府
官至館館人入告蕃使接伴舍人引蕃使出迎於館門
之外贊引引應天府官與蕃使俱入蕃使升自西階應

天府官升自東階至廳蕃使東向立府官西向立贊引
唱鞠躬拜興

凡二

平身蕃使與應天府官皆如禮應天府

官進詣蕃使前致禮待之意畢贊引引蕃使與府官各
就位坐執事者各舉食案進供於蕃使及府官之前執
事者斟酒及進食凡酒五行食三品宴畢贊禮引蕃使
送應天府官出蕃使自西應天府官由東出至館門外
蕃使入明旦應天府官請使者出館俱上馬蕃使行近
右應天府官行近左從人後從至會同館下馬接待舍

人引蕃使由西而入應天府官由東而入至次訖報知中書省中書省奏知命禮部侍郎至會同館禮待其陳設位次食品一如前儀宴畢接待舍人引蕃使及禮部侍郎出蕃使降自西階禮部侍郎降自東階出館門外使者還館其受蕃國來附遣使進貢之儀前期侍儀司引蕃使天界寺習儀三日擇日朝見前一日內使監設御座香案於奉天殿中尚寶卿設寶案於御座前侍儀司設表案於丹墀中道之北及殿上正中設方物位於

表箋案之南中道之東西舉方物案執事位於方物案之左右設使者位於中道之東西方物案之南北向設通事位於使者位之西北向設文武官侍立位於丹墀之北東西相向設受表兼宣表官受方物兼宣方物官位及展表官位於表案之西東向設承制官位於殿內西向及使者之北設典儀二人位於丹陛上東西相向設知班位於丹墀之北東西相向設贊禮位於知班之北東西相向設內贊二人位於殿上東西相向引使者

舍人二人於使者拜位之西東向引文武官舍人四人於文武班之北稍後東西相向侍從班起居注殿中侍御史尚寶卿位於殿上西向指揮司懸刀武官位於殿上東向拱衛司官位於奉天門之左右東西相向典牧所官位於仗馬之前東西相向宿衛鎮撫位於丹陛東西階下東西相向護衛百戶二十四員於宿衛鎮撫之南稍後東西相向護衛千戶八員於殿東西門之左右東西相向將軍二人於殿上東西相向天武將軍四人

於丹陛上之四隅東西相向將軍六人於奉天殿門之
左右東西相向將軍六人於奉天門之左右東西相向
是日金吾衛陳設甲士於午門外之東西列旗仗於奉
天門外之東西拱衛司陳儀仗於丹陛上及丹墀之東
西陳五輅於丹陛之南典牧所陳仗馬於文武樓之南
東西相向陳虎豹於奉天門外和聲郎陳樂於丹墀諸
蕃使拜位之南擊鼓初嚴侍儀舍人入陳拜席引班引
文武百官各具朝服次嚴引班引文武百官齊班於午

門外東西相向以北為上禮部執事以方物各置於案
各執事俱入就位諸侍衛官各服其器服及尚寶卿侍
從官入詣謹身殿奉迎引班引使者服朝服奉表執事
者舁方物前行使者朝服後從由午門入就金水西橋
入西掖門至丹墀西東向序立擊鼓三嚴引班引文武
官入就侍立位侍儀版奏外辦御用監跪奏皇帝服皮
弁御輿以出尚寶卿捧寶及侍儀侍衛導從如常儀皇
帝將出仗動樂作陞御座樂止尚寶卿置寶於案鳴鞭

二天

案取表跪宣於殿西展表官同跪展宣訖俯伏興宣表
官以表置於案退立於殿西宣方物狀官請案取方物
狀跪宣於殿西展方物狀官同跪展宣訖俯伏興宣方
物狀官以方物狀置於案與宣表官展表官由殿西門
出復位贊禮唱俯伏興使者及衆使者皆俯伏興平身
贊禮唱復位引禮引使者退復位承制官承制自中門
出中階降詣使者前稱有制贊禮唱跪使者及衆使者
皆跪承制官宣制曰皇帝制問使者來時想爾某國君

安好使者答畢贊禮唱俯伏興拜興

凡四

平身使者及衆

使者皆如禮樂止承制官稱有後制贊禮唱跪使者及

衆使者皆跪承制官宣制曰皇帝又問爾使者遠來勤

勞使者答畢贊禮唱俯伏興拜興

凡四

平身使者及衆使

者皆如禮樂止承制官自西階升西門入回奏訖復侍

立位贊禮唱鞠躬拜興

凡四

平身使者及衆使者皆如禮

樂止禮部官收表及方物引使者出侍儀奏禮畢上興

駕回樂作還宮樂止引班引文武百官及使者以次出

臣等謹按漢時呼韓邪單于入覲蕭望之謂單于非正朔所加宜待以不臣之禮後代蕃使朝貢儀注率多優假皆本於望之之議明初定蕃使入朝宣制撫問國君並及使者略如敵國之儀此亦沿習歷代具文而揆諸大一統之朝所以駕馭蕃服者其說固未當也夫溥天率土莫非王臣要荒之裔以職事來朝正宜示以曩憲俾知共主之尊義在則然即頑梗不率之風因之盡戢彼望之之議

特以威德不能及遠聊為權宜之計耳後儒無識
遂至承訛襲繆豈知帝王撫臨中外予以拊循尤
當明其體制若槩以敵國待之轉致取輕殊俗於
恩威並用之道寧有當哉洪惟我

國朝以文德武功撫一區宇蒙古內外扎薩克等歲時
分班入

覲秋獮行圍執橐扈從迨西陲大定準噶爾回部盡入
版圖而絕遠諸部若哈薩克布魯特安集延巴達

克山等無不欵塞請吏願為臣僕近者土爾扈特
率其全部稽首歸降並隸編戶自餘朝鮮安南琉
球暹羅南掌西洋之屬世世隸於典屬恭順彌加蓋
天家德威遠暨遐荒奉朔曉然識

共主之尊歲事請朝理藩院率領於班行之末九叩抒
誠或遇

錫宴賜幣拜跪如禮已為榮幸豈復有賓客之足言蓋
時勢既殊儀文自別不獨破除因循陋習而已

蕃使每歲常朝於中書省接受表箋方物是日於省門
前執事者置方物於案引禮引使者捧表箋由中門入
方物隨行至堂上置方物於前丞相興使者捧表箋各
至丞相前丞相受表箋各授於執事使者退立於西司
壺舉杯者出舉杯者以杯先進於丞相丞相執杯使者
跪持酒飲畢退立引禮引使者由西廊出戶部受方物
報侍儀司習儀次日各依品從具公服行五拜禮出午
門釋服於東宮行禮其受蕃使每歲常朝之儀中書省

受表箋侍儀司引蕃使於天界寺習儀擇日朝見前一
日內使監陳設御座香案於奉天殿如常儀侍儀司設
使者位於丹墀中道上之西北向承制官侍立位於殿
內之東宣制位於使者之北百官侍立位於丹墀之北
東西相向知班二人位於使者之北東西相向贊禮二
人位於知班之北東西相向典儀二人位於丹陛上東
西相向引使者二人位於使者之西東向引文武班四
人位於文武班之北稍後東西相向侍從班位於殿上

東西相向文東武西導駕官位於殿內東西相向將軍
六人位於奉天門之左右將軍六人位於奉天殿門之
左右將軍四人位於丹陛上之四隅將軍二人位於奉
天殿內簾前之左右宿衛鎮撫二人位於丹墀東西階
下東西相向護衛二十四人位於宿衛鎮撫之南稍後
東西相向護衛千戶八員位於殿東西門之左右拱衛
司陳設儀仗於丹墀丹陛之東西鳴鞭四人於丹陛上
北向拱衛司光祿寺官侍立位於殿門之左右是日侵

晨擊鼓初嚴各執事陳設如儀引班催請使臣及百官
各具朝服次嚴執事各入就位引班引百官使者齊班
於午門外東西相向三嚴引班引百官入就侍立位引
使者入立於丹墀之西導駕官入謹身殿奉迎侍儀奏
外辦御用監官跪奏皇帝具通天冠絳紗袍侍從導引
出宮樂作陞御座樂止捲簾鳴鞭報時訖引班引使者
入就位知班唱班齊贊禮唱鞠躬拜興凡平身如禮樂
止承制官前跪承制由中門出中階降至使者前稱有

制贊禮唱某等跪聽使者跪承制官宣制曰皇帝制問
使者來時爾某國王某安好使者荅畢贊禮唱俯伏興
拜興凡平身使者如禮樂止承制官稱有後制使者跪
承制官宣制曰皇帝又問爾使介遠來勤勞使者又荅
畢贊禮唱俯伏興樂作拜興凡平身使者如禮樂止承
制官由西階陞西門入回奏訖復侍立位贊禮唱鞠躬
拜興凡平身使者皆如禮樂止侍儀奏禮畢興駕回
樂作還宮樂止引班引文武百官及使者以次出 蕃

使進貢及參見畢禮部官奏奉聖旨錫宴於會同館前期館人陳設坐次於會同館正廳賓西主東中設御酒案於正中膳部主客命執事設酒案及食案於廳之南楹教坊司陳設樂舞於酒案之左右是日禮部官陳龍亭於午門外光祿寺官取旨捧御酒置於龍亭儀仗鼓樂前導禮部官光祿寺官乘馬後隨至館門館人入報蕃使出迎於館門之外執事者捧御酒前行引贊引奉旨官從行由中道入至廳上置於案使者自西階陞立於

西隅奉旨官立於御酒案之東稱有制使者望闕跪聽

宣制畢贊禮唱鞠躬拜興

凡

平身使者如禮奉旨官舉

杯酌酒授使者飲北面同跪使者飲畢贊禮唱鞠躬拜

興

凡

平身如禮贊禮引使者及奉旨官就席坐執事者

舉食案進供於使者及奉旨官之前執壺者斟酒樂作

飲畢樂止酒七行湯七品上湯擊鼓行酒作細樂及陳

雜戲宴畢使者送奉旨官出至館門外奉旨官上馬使

者入擇日皇太子錫宴陳設食品禮部皆如前儀蕃使

將還國禮部奏知戒蕃使某日陞辭前二日於天界寺
習儀前一日內使監陳設御座香案於奉天殿侍儀司
設蕃使拜位於丹墀中道稍西北向設文武官侍立位
於丹墀之北東西相向承制官位於殿上之東及宣制
位於丹陛上之東南設知班二人位於蕃使之北設贊
禮二人位於知班之北典儀二人位於丹陛上之南俱
東西相向設引蕃使舍人二人位於蕃使之西東向引
文武班舍人四人位於文武班之北稍後東西相向侍

從班位於殿上之東西拱衛指揮光祿寺官位於殿門
前之左右內使擎執八人位於御座前之左右宿衛鎮
撫位於丹陛東西階下護衛百戶二十四人位於鎮撫
之南稍後俱東西相向護衛千戶八人位於殿東西門
之左右將軍二人位於殿之左右將軍六人位於殿門
之左右將軍四人位於丹陛之四隅將軍六人位於奉
天門之左右俱東西相向鳴鞭四人位於丹陛上之南
是日侵晨金吾衛陳設兵仗於午門外之東西拱衛司

陳儀仗於丹墀丹陛之東西樂工陳樂於丹墀之內擊鼓初嚴禮部官於午門外以御酒禮物置於案執事者

若干人服窄紅衫舉案捧禮物官具朝服若干人從入

陳案於丹陛上東西

如賜詔則設詔書案於蓋物案之北拱衛司用黃蓋遮覆執事

各入就位舍人催文武官及蕃使具朝服擊鼓次嚴侍儀侍衛入迎車駕舍人引文武官齊班於午門外之東西引使者立於武官之南東向擊鼓三嚴引班引文武官入就侍立位引蕃使入立於丹墀之西南侍儀版奏

外辦御用監跪奏皇帝服皮弁服御輿以出侍儀侍衛
導從警蹕如常儀皇帝將出仗動樂作陞御座樂止將
軍捲簾鳴鞭雞唱報時訖引禮引蕃使入就位贊禮唱
鞠躬拜興凡平身蕃使皆如禮樂止承制官詣御座前
跪承制由殿中門出立於宣制位稱有制贊禮唱某官
跪聽蕃使皆跪承制官宣制曰皇帝制諭宣畢贊禮唱
俯伏興拜興凡平身蕃使皆如禮樂止承制官由殿西
門入跪奏云承制訖復侍立位贊禮唱鞠躬拜興凡平

身蕃使皆如禮樂止贊禮唱禮畢捧禮物官捧禮物自

丹墀中道降由奉天中門出

如有詔則黃蓋遮覆詔書出

舍人引蕃

使由奉天西門出侍儀奏禮畢皇帝興樂作還宮樂止

引禮引百官以序出捧禮物官捧禮物至午門付使者

行每歲常朝具本品公服隨班行五拜禮蕃使辭東宮

禮部官率應天府官送出國門之外至龍江驛禮部官

還應天府官設宴如初至之儀宴畢應天府官還驛丞


送起行穆宗隆慶五年九月復朝鮮使臣引見舊班初

帝用鴻臚卿李際春言四夷貢使俱不得至御前引見至是禮科都給事張國彥等奏朝鮮屬國乃冠帶禮義之邦宜仍復舊班以示優禮從之

天子遣使迎勞諸侯

臣等謹按杜佑所述天子遣使迎勞諸侯乃封建舊制所謂小行人迎勞於畿大行人勞視館載於禮經後世不行久矣宋與遼金則有國使往還如古諸侯相交聘比附朝覲亦以類從耳非盡如古

所云也其諸侯來朝天子遣使迎勞獨明集禮所
載較詳然類敘天子受諸侯朝覲之下事無複出
義屬相通故不復敘



欽定續通典卷七十

欽定四庫全書

史部

欽定續通典卷七十一

詳校官監察御史_臣曹錫寶

洗馬_臣王坦修覆勘

校對官編修_臣

程昌期

謄錄監生_臣

張鴻洲

欽定四庫全書

欽定續通典卷七十一

禮賓

三恪二王後

五代

宋

金

元

明

臣等謹案三恪二王後之說經無正文鄭康成據樂記武王克商封黃帝堯舜夏殷之後謂杞宋為二王後祝薊陳為三恪杜預據左傳以備三恪之文謂周封夏殷二王後又封舜後并之為三恪兩

說不同崔靈恩三禮義宗主鄭氏說而杜佑非之
謂尊賢不過二代黃帝堯舜自以功德崇深特封
其後非古今通法故累朝皆以三代為三恪其說
近是然推古制禮之意蓋以虞夏由於受禪湯武
起自藩臣於勝國子孫禮宜優異且歲首迭用三
正樂懸具陳六代文質損益不可偏廢故必兼存
三統以備一王之制自封建改為郡縣革命之事
已異古初自不必更沿三恪之舊而魏晉以降猶

相承不改者則以既假禪讓之故事不得不修備
恪之空文然名雖託於賓王實則同於幽禁揆諸
古昔隆禮先代之指相去絕遠若宋承周禪惟立
周後不及前代且舍郭氏而立柴宗議者多訾其
失元之瀛國公明之崇禮侯雖加封爵而未聞世
及恩亦浸薄洪惟我

太祖

太宗肇基東土功德綿長及明莊烈之末流寇作難神器

不守我

世祖章皇帝命將專征殲除巨憝撫一中外傳祚萬世昔
人謂三代以下惟漢與明崛起編戶較之晉隋唐
宋為得其正然漢高帝明太祖雖未臣事於秦與
元猶在食毛踐土之列揆之大義不無間然我
朝於明本為敵國至明季國祚已移中原無主然後
王師翦除流賊且為明之臣民雪不共之恥初非取天
下於明也是則推得統之正不惟遠逾唐宋抑且

度越漢明豈於明之後裔猶當有賓禮待之之義
然猶追念前代恩禮頻加逮我

世宗憲皇帝御極之初仰承

聖祖仁皇帝成命訪求明裔爵之通侯世世罔替我

皇上肇錫嘉名寵以延恩侯之號俾與五等諸藩並荷
榮封而永苗裔蓋禮以義起迥非三恪作賓之文
所可同年而語矣爰因叙賓禮而并析其義云

梁太祖開平二年以唐宗室子鴻臚卿李從封萊國公

為二王後時中書門下奏萊國公李嶷合於西都選地
建立三廟以備四仲祠祭每祭仍令度支供給祭料從
之是時禮儀使又奏唐朝以魏元氏子孫封韓國公為
三恪以周宇文氏子孫封介國公隋楊氏子孫封鄜國
公為二王後今國家受禪封唐李氏宗室子李嶷為萊
國公今請以介國公為三恪鄜國公萊國公為二王後
從之

晉高祖天福二年勅周以杞宋封夏殷之後為二王後

兼封舜之後為三恪唐以周隋之後封公為二王後又
封魏之後為三恪宜於唐朝宗屬中取一人封公世襲
兼隋之鄴國公為二王後以後周介國公備三恪主祀
及赴大朝會委所司具典禮申奏其唐朝宗屬中舊在
朝及諸道為官者各據資歷考限滿日從品秩序選已
有出身仍令參選四年勅以鄆國三千戶封唐許王李
從益為鄆國公奉唐之祀服色旌旗一依舊制以西京
至德宮為廟牲幣器用祭服悉從官給

按梁晉皆以唐
及隋為二王後

通周後
為三恪

漢高祖天福十二年夏五月甲午以郇國公李從益知
南朝軍國事

宋太祖建隆元年正月詔曰封二王之後備三恪之賓
所以示子傳孫興滅繼絕夏商之居杞宋周隋之啓介
鄫古先哲王實用茲道矧予涼德歷試前朝雖周德下
哀勉從於禪讓而虞賓在位豈忘於烝嘗其封周帝為
鄭王以奉周嗣正朔服色一如舊制又詔曰朕唯眇躬

逮事周室謳歌獄訟雖歸新造之邦廟貌園陵豈忘舊
君之禮其周朝嵩慶二陵及六廟宜令有司以時差官
朝拜祭饗永為定式仍命周宗正卿郭玘行禮仁宗天
聖六年錄故號州防禦使柴貴子肅為三班奉職七年
錄故太子少傅柴守禮孫詠為三班奉職其後又錄柴
氏之後曰熙曰愈曰若拙曰上善並為三班奉職曰餘
慶曰誠為州長史助教曰貽廊等十一人復其身仍各
賜錢一萬又錄世宗曾孫揆柔及貴曾孫日宣守禮曾

孫若訥皆為三班奉職嘉祐四年著作郎何昂言舜受堯禹受舜之天下而封丹朱商均以為國賓周漢以降以及於唐莫不宗奉先代延及苗裔本朝受周天下而近代之盛莫如唐自梁以下皆不足以崇襲臣願考求唐周之裔以備二王之後授以爵命封縣立廟世世承襲永為國賓事下太常議曰古者立二王後不唯繼絕兼取其明德可法五代草創載祀不永文章制度一無可考上取唐室世數已遠於經不合惟周則我受禪之

所自義不可廢宜訪求子孫如孔子後衍聖公授一京
官爵以公號使專奉廟歲時存問賜之粟帛牲器祭服
每遇時祀並從官給其廟宇亦加嚴飭如此則上不失
繼絕之義度之於今亦簡而易行從之四月詔曰先王
推紹天之序尚尊賢之義褒其後嗣賓以殊禮豈非聖
人稽古報功之大典哉國家受命之元繼周而王雖民
靈欣戴歷數允集而虞賓將遜德美丕顯頌者推命本
始褒及支庶每遇南郊許奏白身一名充班行恩則厚

矣而義未稱將上采姚姒之舊畧循周漢之典詳其世
嫡優以公爵異其仕進之路申以田土之錫俾廟寢有
奉饗祀不輟庶幾乎春秋通三統厚先代之制矣宜令
有司取柴氏譜系於諸房中推最長一人令歲時親奉
周室祀事如白身即與京主簿如為班行者即比類換
文資仍封崇義公與河南府鄭州合入差遣給公田十
頃專管勾陵廟應緣祭饗禮料所須皆從官給如至知
州資序即別與差遣却取以次近親令襲爵授官永為

定式八月太常禮院定到內殿崇班相州兵馬都監柴詠於柴氏諸族最長詔換殿中丞封崇義公簽書奉寧節度判官事以奉周祀又以六廟在西京而歲時祭饗無器服之數令有司以三品服一四品服二及所當用祭器給之神宗熙寧四年西京留守司御史臺司馬光言崇義公柴詠祭祀不以儀式周本郭姓世宗后姪為郭氏後今存周後則宜封郭氏子孫以奉周祀帝閱奏問王安石安石曰宋受天下於世宗柴氏也帝曰為人

後者為之子安石曰為人後於異姓非禮也雖受天下
於郭氏豈可以天下之故而易其姓氏所出帝然之五
年正月柴詠致仕詠長子早亡嫡孫夷簡當襲太常禮
院言夷簡有過合以次子西頭供奉官若訥承襲詔以
若訥為衛尉寺丞襲封崇義公簽書河南府判官廳公
事徽宗政和八年詔曰昔我藝祖受禪於周嘉祐中擇
柴氏旁支一名封崇義公議者謂不當封周然禪國者
周而三恪之封不及禮蓋未盡除崇義公依舊外擇柴

氏最長見在者以其祖父為周恭帝後以其後世世為宣義郎監周陵廟與知縣請給以示繼絕之仁為國二

恪永為定制

按世宗與恭帝後為二恪是郭氏子孫終未見錄也司馬光之言惜乎未行高

宗紹興五年詔周世宗元孫柴叔夏為右承奉郎襲封

崇義公奉周後二十六年叔夏升知州資序別與差遣

以子國器襲封令居衢州朝廷有大祀則入侍祠如故

事其柴大有柴安宅亦各補官理宗淳祐九年春正月

詔周世宗八世孫柴彥穎補承務郎襲封崇義公

按時又求

隋唐及朱氏李氏石氏劉氏郭氏之後及吳越荆南湖南蜀漢諸國之子孫皆命以官使守其祀

金太宗天會三年八月遼主延禧入見降封海濱王六年八月以宋二庶人入見封其父昏德公子重昏侯熙宗皇統元年二月改封海濱王耶律延禧為豫王昏德公趙佖為天水郡王

及齊劉豫為三恪

重昏侯趙桓為天水郡

公十二月天水郡公趙桓乞本品俸詔賙濟之三年八月詔給天水郡王孫及天水郡公壻俸祿

元世祖至元十三年夏五月布延以宋主焘至上都制

授顯開府儀同三司檢校大司徒封瀛國公

明太祖洪武元年詔封元皇孫邁達哩巴拉為崇禮侯
七年九月上謂廷臣曰草木無心遇春而茂遇秋而零
落氣之所感猶知榮悴況於人乎崇禮侯邁達哩巴拉
南來已五載今已長成豈無父母鄉土之思宜遣之還
於是厚禮而歸之

天子朝位 五代 宋 遼 金 元 明

後唐明宗天成元年五月詔每月朔望日賜百官廊下

餐

按唐室升平日常參官每日退朝賜食謂之廊餐自乾符亂離之後祇遇月旦入閣日賜食上初即位命

百官五日一起居御史中丞李琪以為非故事請罷之唯每月朔望日入閣賜食至是宣旨朔望入閣外依舊五日一起居遂為定式又按葉夢得曰唐以宣政殿為前殿謂之正衙即古之內朝也以紫宸殿為便殿謂之上閣即古之燕朝也而外別有含元殿古者天子三朝外朝內朝燕朝外朝在王宮庫門外有非常之事以詢萬民於宮中內朝在路門外燕朝在路門內蓋內朝以見羣臣或謂之路朝燕朝以聽政猶今之奏事或謂之燕寢鄭氏小宗伯注以漢司徒府有天子以下大會殿為周之外朝而蕭何造未央宮言前殿則宜有後殿大會殿設於司徒府則為外朝而宮中有前後則為內朝燕朝蓋去周猶未遠也唐含元殿宜如漢之大會殿宣政紫宸乃前後殿其沿習有自來矣方其盛時宣政蓋常朝日見羣臣遇朔望陵寢薦食然後御紫宸旋傳宣

喚仗入閤宰相押之由閤門進百官隨之入謂之喚仗入閤紫宸殿言閤猶古之言寢此御朝之常制也中世亂離宣政不復御正衙立仗之禮遂廢惟以隻日常朝御紫宸而不設仗敬宗始復修之因以朔望陳仗紫宸以為盛禮亦謂之入閤誤矣又曰唐正衙日見羣臣百官皆在謂之常參喚仗入閤百官亦隨以入則唐制天子未嘗不日見百官也其後不御正衙紫宸所見惟大臣及內諸司百官俟朝於正衙者傳聞不坐即退則百官無復見天子矣敬宗再舉入閤禮之後百官復存朔望兩朝至五代又廢故後唐明宗始詔羣臣每五日一隨宰相入見謂之起居時李琪為中丞以為非禮請復朔望入閤之禮明宗曰五日起居吾思見羣臣不可罷朔望入閤可復遂以五日羣臣一入見中興便殿為起居朔望天子一出御文明前殿為入閤訖

宋因五代之制文武官每日赴文明殿正衙常參宰相

一人押班五日起居即崇德長春二殿中書門下為班
首其長春殿常朝則內侍省都知押班率內供奉官以

下并寄班等先起居次閤門使次三班使臣

節度觀察
防禦團練

刺史等子弟充供奉官侍禁
殿直有旨令預內朝起居者

次內殿當直諸班

殿前指
揮使左

右班都虞候以下內殿直散
直散指揮散都頭金槍班等

次長入祇候東西班殿侍

次御前忠佐次殿前都指揮使率軍校至副指揮使次

駙馬都尉

任刺史以上
者級本班

次諸王府僚次殿前司諸軍使

都頭次皇親將軍以下至直殿次行門指揮使率行門

起居

以上並內侍贊謁

如傳宣前殿不坐即宰相與樞密使文

明殿學士三司使翰林樞密直學士中書舍人三司副

使知起居注皇城內監庫藏朝官諸司使副內殿崇班

供奉官侍禁殿直翰林醫官待詔等同班入

中書舍人乾德後始

令赴內朝三司判官太平興國前赴內殿其後罷之止隨百官五日起居中書舍人知起居注遇五日起居之

時亦各赴外朝

次親王次侍衛親軍馬步軍都指揮使率軍校

至副指揮使次使相次節度使次統軍次兩使留後觀

察使次防禦團練使刺史次侍衛馬軍步軍使都頭起

居畢見謝班入如御崇德殿即樞密使以下先就班俟

升坐

諸司使副以下至殿直分東西對立餘皆北向長春殿皆北向

宰相參知政事最

後入

以上並閣門贊謁

日止再拜朔望及三日假即樞密使以

下皆舞蹈國初近侍執事之臣皆赴晚朝後罷之凡早

朝宰相樞密宣徽使起居畢同升殿問聖體宰相奏事

樞密宣徽使退候宰相對畢樞密使復入奏事次三司

開封府審刑院

遇百官起居即樞密宣徽使侍立俟左右巡使出即退其崇德殿三司使文明

樞密直學士內客省使仍侍立舊三司使奏事副使判官同對其後止副使司之大中祥符九年詔自今有大

事許判官及羣臣以次升殿大而省以上領務京師者有公事許即請對自餘受

同上之使出入要切者欲面其見謝辭官以次入於庭出使閣散及未

議泰事則先聽進止升朝官或止拜於殿門外自秘書監上將軍觀察使內客省使以上得拜殿前階上及升殿止拜御座前餘皆

庭中凡見者先之謝次之辭又次之其班次先宰相次親王次樞密副使

參知政事次內職內臣次使三司學士兩省御史臺文武班節使以下次將軍校次雜班惟宰相親

王使相赴崇德殿即宣徽使通喚餘皆側立候通再拜

舞蹈致詞辭即不舞蹈見即將相升殿問聖體其賜分

物酒食及收進奉物皆舞蹈稱謝凡收進奉物皆入謝幕職州縣

官謝辭即判銓官引對魚於殿門外宣辭戒勵凡國有大慶瑞出師勝捷樞密使率內職軍校入賀致詞閣門使宣答訖當侍立者升殿次百官入宰相致詞宣徽使宣答賜酒即預坐官後入作樂送酒如曲燕之儀凡視

朝退進食訖易服御崇政殿或承明殿先羣臣告謝

自諫

舍知雜御史以上及帶三司官王府僚屬歷官醫官刺史以上上將軍并發運使轉運使并許焉自非宣制並捧官告敕叙謝其貴近者或賜坐賜茶餘或改章服即謝訖易服又告謝再拜次軍頭引見司

奏事於殿陛下次三班審官院流內銓刑部及諸司引

見官吏

後詔審官院引對京朝官奏課不得過三人差遣不得過五人三使部選人差遣各不得過十

人如假期起居辭見畢即移御座臨軒視事既退復有

羣司奏或閱器物之式謂之後殿再坐太祖建隆二年

八月朔上御崇元殿行入閣儀置待制候對官賜廊下

食

按入閣唐制起於天寶明皇以無為守成詔晏朝喚仗百官從容至閣門入蓋唐前舍元殿非正至大朝

會不御次宣政殿謂之正衙每坐朝必立仗於正衙或御紫宸殿即喚正衙仗自宣政殿兩門入是謂東西上閣門故謂之入閣其後遂為常朝之儀五代以來既廢正衙立仗而入閣亦希闕不講至是復行之然御前殿非唐舊矣崇元殿即大慶殿前殿也待制候對者亦唐制也每正衙待制官兩員正衙退後又令六品以下於

延英侯對皆所以備顧問其後每入閣即有待制次對
官後唐天成中廢至是復行之廊下食起居唐貞觀其後
常參官每日朝退賜食謂之廊餐唐末神宗熙寧三年
浸廢但於入閣起居日賜食今循其制

知制誥宋敏求等言文德殿入閣儀制考之國朝會要
與今儀制所載頗或異同按今文德殿唐宣政殿也紫
宸殿唐紫宸殿也然祖宗朝皆嘗御文德殿入閣唐制
常設仗衛於宣政殿或遇上坐紫宸即喚仗入閣如此
則當御紫宸殿入閣方協舊制請下兩制及太常禮院
詳定詔學士院議翰林學士承旨王珪等言按入閣者

乃唐隻日紫宸殿受常朝之儀也唐宣政殿即今文德殿唐紫宸殿今紫宸殿也唐制天子坐朝必立仗於正衙若止御紫宸即喚正衙仗自宣政殿東西閣門入故為入閣五代以來遂廢正衙立仗之制今閣門所載入閣儀者止是唐常朝之儀非為盛禮不可遵行從之自是入閣之禮遂罷之敏求又言本朝以來惟入閣乃御文德殿視朝今既不用入閣儀即文德殿遂闕視朝之禮請下兩制及太常禮院約唐制御宣政殿裁定朔望

御殿儀以備正衙視朝之制詔學士院詳定儀注學士韓維等以入閣圖增損裁定上議曰朔日不值假前五日閣門關諸司排辦前一日有司供帳於文德殿其日左右金吾將軍常押本衛仗判殿中省官押細仗先入殿庭東西對列文武官等分東西序立諸軍將校分入北向立朝堂引贊官引彈奏御史二員入殿門踏道當下殿北向立次催文武班分入並東西相向對立諸軍將校即於殿庭北向立班

其班次並御史臺祇應御

皇帝服靴袍垂

拱殿坐鳴鞭內侍閣門管軍依朔望常例起居次引樞
密宣徽使三司使副樞密直學士內客省使以下至醫
官待詔及修起居注官二員並大起居皇帝乘輦至文
德殿後閣門奏班齊皇帝自後閣出殿上索扇升榻鳴
鞭扇開簾捲儀鑾使焚香喝文武官就位四拜起居雞
人唱時舍人於彈奏御史班前西向喝大起居御史由
文武班後至對立位次引左右金吾將軍合班於宣制
石南大起居班首出班躬奏軍國內外平安歸位再拜

各歸東西押仗位通喝舍人於宣制石南北向對立舍人退於西階次揖宰臣親王以下躬奏文武百僚宰臣某姓名以下起居分引宰臣以下橫行諸軍將校仍舊

立閣門使喝大起居舍人引宰臣至儀石北俯伏跪致

詞祝月訖

其詞曰文武百僚宰臣全銜臣某姓名等言孟春之吉伏惟皇帝陛下膺受時祉與天無

窮臣等無任歡呼舞蹈之至

歸位五拜閣門使揖中書由東階升殿

樞密使帶平章事以上由西階升殿侍立

並依圖

給事中

一員

以知門下封駁事官充

歸左省位立轉對立於給事中之南

如罷轉對官每遇御史臺前期牒請文官吏部侍郎及二員並依轉對官例先於閣門投進奏狀

刑法官立於轉對官之南兵部侍郎於右省班南與吏

部侍郎東西相向立定措笏各出班籍置笏上

吏部兵部侍郎

以知審官東西院官充刑法官以知審刑大理寺官充

親王使相以下分班出引

轉對官於宣制石南宣徽使殿上承旨宣答如儀次吏

部兵部侍郎及刑法官對揖出

見謝辭班自從別儀

次彈奏御史

無彈奏對揖出

如有彈奏並如儀

引給事中至宣制石南揖躬

奏殿中無事唱祇候揖西出次引修起居注官次立排

立供奉官以下各合班於宣制石南躬唱祇候揖分班
出唱文武官等門外祇候出索扇垂簾皇帝降座鳴鞭
舍人當殿承旨放仗四色官殿鞞急趨至宣制石南稱
奉敕放仗金吾將軍并判殿中省官對拜訖隨仗出親
王使相節度使至刺史學士臺省官文武百僚諸將軍
校等並序班朝堂謝賜茶酒皇帝御垂拱殿座中書樞
密及請對官奏事不引見謝辭班後殿座臨時取旨其
日遇有德音制書御札仍候退御垂拱殿座制箱出外

應正衙見謝辭文武臣僚並依御史臺儀制喚班依序
分入於文武班後以北為首分東西相向重行異位依
見謝辭班序位餘押班臣僚於班稍前押班候刑法官
對揖出分引近前揖躬舍人當殿宣班引轉對班見謝
辭並如紫宸殿儀樞密使不帶平章事叅知政事至同
簽書樞密院事宣徽使並立於宣制石稍北宰臣親王
樞密帶平章事使相繫押班者立於儀石南
餘官並立於宣制石
南并合贊引並如儀贊喝訖係中書樞密並揖升殿謝
喝閤門使

辭揖西出其合問聖體者並如儀餘官分班出

彈奏御史候見

謝辭班絕對揖出其朝見如謝都城門外御筵及詔赴闕謝茶藥撫問之類不可合班者各依別班中謝對賜酒食等並門賜其係正衙

應正衙見謝辭臣僚前一日

見門謝辭亦門外唱放

於閤門投詣正衙榜子閤門下奏目又投正衙狀於御史臺四方館應朔日或得旨罷文德殿視朝止御紫宸殿起居其已上奏目正衙見謝辭班並放免依官品隨赴紫宸殿引或值改依常朝文德殿自有百官班日並如舊儀應外國蕃客見辭候喚班先引赴殿庭東邊依

本國職次重行異位立候見謝辭班絕西向躬舍人當殿通班轉於宣制石南北向立贊唱如儀西出其酒食

分物並門賜如有進奉候彈奏御史出入進奉入

惟御馬及

檐牀自殿西偏門入東偏門出其進奉出入文武官起居舍人通某國進奉宣徽使喝進奉出節次如紫宸殿

儀候進奉出給事中奏殿中無事出其後殿再座合引

出者從別儀其日賜茶酒宰臣樞密於閣子親王於本廳使相宣徽使觀文殿大學士至寶文閣直學士兩省官待制三司副使文武百官皇親使相以下至率府副

率及四廂都指揮使以下至副都頭並於朝堂

如朝堂位次不

足即於朝堂門外序次

管軍節度使至四廂都指揮使節度使兩

使留後至刺史並於客省廳詔依所定徽宗政和三年

九月引進使李端愬言近朔望御文德殿視朝初寒盛

暑數煩清蹕而紫宸之朝歲中罕御請朔日御文德既

望坐紫宸庶幾正衙內殿朝儀並舉從之十一月侍御

史知雜事滿中行言文德正衙之制尚存常朝之虛名

襲橫行之謬例有司失於申請未能釐正兩省臺官文

武百官赴文德殿東西相向對立宰臣一員押班聞傳不坐則再拜而退謂之常朝遇休假并三日以上應內殿起居官畢集謂之橫行自宰臣親王以下應見謝辭者皆先赴文德殿謂之過正衙然在京釐務之官例以別勅免參宰臣押班近年已罷而武班諸衛本朝又不常置故今之赴常朝者獨御史臺官與審官待次階官而已今垂拱內殿宰臣以下既已日參而文德常朝仍復不廢舛謬倒置莫此為甚至於橫行參假與夫見謝

辭官先過正衙雖沿唐之故事然必俟天子御殿之日行之可也高宗紹興十二年臣僚又奏乞明詔有司講求祖宗故實常朝視朝正衙便殿朝會之儀舉而行之以隆帝業用稱萬邦百辟尊君之心天下幸甚詔令禮部太常寺閤門同共討論尋討論在京月朔日文德殿視朝紫宸殿日參望參垂拱殿日參四參假日崇政殿坐聖節垂拱殿上壽今乞先次宰臣率百僚拜表奏請皇帝御正殿視朝若降指揮許允其合行事務續令逐

處條具申請詔從之十一月三日權禮部侍郎王賞等
言契勘朝會之制正旦冬至及慶賀受朝係御大慶殿
其文德紫宸垂拱殿禮制不同月朔視朝則御文德殿
謂之前殿正衙仍設黃麾半仗其餘紫宸垂拱皆係側
殿不設儀仗今來已降指揮依臣僚所請乞降朝會之
儀緣元正在近大慶殿之禮事務至多欲乞先舉行文
德殿視朝之制其朝會合服朝服并設樂上壽間飲三
周設祥瑞表案等并乞候來年冬至前別行取旨詔依

從之

遼穆宗即位詔朝會依嗣聖皇帝故事用漢儀常朝起居儀昧爽臣僚朝服入朝各依幕次內侍奏班齊先引京官班於三門外當直舍人放起居再拜各祇候依次兩府以下文武官於丹墀內面殿立侍班諸司并供奉官於東西道外相向立定當直閣使副贊放起居再拜各祇候退還幕次公服帝升殿坐兩府并京官丹墀內聲喏各祇候教坊司同北班起居畢奏事燕京就嘉寧

殿西京就同文殿朝服以幘頭袍笏公服以紫衫帽正
座儀皇帝升殿座警聲絕契丹漢人殿前班畢各依位
侍立次教坊班畢捲退京官班入拜畢揖於右橫街西
依位班立次武班入拜畢依位立文班入拜畢依位立
北班入起居畢於左橫街東序班立次兩府班入鞠躬
通宰臣某官以下起居拜畢引上殿奏事已上六班起
居並七拜內有不帶節度使班首止通名亦七拜捲班
與常朝同直院有旨入文班留守司三司統軍司制置

使謂之京官都部署司官使副都丞以下令史北面主事以下隨駕諸司為武官館閣大理寺堂後以下御史臺隨駕閒員令史司天臺翰林醫官院為文官

金熙宗天眷二年詔詳定常朝及朔望儀准前代制以朔日六日十一日十五日二十一日二十六日為六參日後又定制以朔望日為朝參餘日為常朝凡朔望朝參日百官卯時至幕次皇帝辰刻視朝供御努手繖子直於殿門外分兩面排立司辰入殿報時畢皇帝御殿

坐鳴鞭閤門報班齊執擎儀物內侍分降殿階兩旁面
南立宿衛官自都點檢至左右親衛祇應官自宣徽閤
門祇候先兩拜班首少離位奏聖躬萬福兩拜弩手繼
子先於殿門外東西向排立俟奏聖躬萬福時即就位
北面山呼聲喏起居畢即相向對立擎御傘直立左班
內侍上都點檢以次升殿副點檢在少南東西相向立
左右衛在殿下東西相向立閤門乃引親王班贊班首
名以下再拜訖班首少離位奏聖躬萬福歸位再拜畢

先退次引文武百僚班首以下應合朝參官并府運六品以上官皆左入至丹墀之東西向鞠躬畢閣門通唱復引至丹墀閣門贊班首名以下起居舞蹈五拜又再拜畢領省宰執升殿奏事殿中侍御史對立於左右衛將軍之北少前修起居東西對立於殿欄子內副階下餘退右出初帝就坐置寶匣於殿階之上東南角後定制師傅起居畢御案始東入置定捧案內侍東西分下侍殿隅直日主寶捧寶當殿叩欄奏封前符寶郎及當

監印郎中各一員監當主分令史用印訖主寶吏封受
主寶俟奏事畢進封訖內侍徹案若常朝則親王班退
引七品以下職事官分左右班入丹墀再拜班首稍前
起居畢復位再拜宰執升殿餘官分班退世宗大定二
年命臺臣定朝參禮五品以上職官趨朝朝服入局治
事則展皂自來朝參除殿前班外若遇朔望自七品以
上職事官皆赴其餘朝日五品以上職事官得赴六品
以下止於本局司治事如左右司員外郎侍御記注院

等官職雖不係五品亦赴朝參若拜詔則但有職事及七品以上散官皆赴朝參吏員令譯使通事檢法各於本局待官員朝退赴局簽押文字不得於宮內署押七品以下流外職遇朝日亦不合入宮如左右司都事有須合奏事乃聽入宮七品以上職事官如遇使客朝辭見日依朔望日皆赴若元日聖節拜詔車駕出獵迎送詣祖廟燒飯但有職事并七品以上散官皆赴凡親王宗室已命官者年十六以上皆隨班赴起居五年

右諫議大夫伊喇子敬言明安穆昆不得與州鎮官隨班入見非軍民一體之意上是其言責宣徽院令隨班入見凡班首遇朝參有故不赴以次押班凡五品以上及侍御史尚書諸司郎中太常丞翰林修撰起居注殿中侍御史補闕拾遺赴召或假一月以上若除官出使之類皆通班入見辭謝除官於殿門外見謝班皆舞蹈七拜辭班四拜門見謝辭並再拜

元世祖中統元年監察御史魏初上疏曰臣聞君猶天

也臣猶地也尊卑之禮不可不肅方今內有太常有史
官有起居注以議典禮記言動外有高麗安南使者入
貢以觀中國之儀昨聞錫燕大臣威儀弗謹非所以尊
朝廷正上下疏入帝欣納之至元初尚未遑興建宮闕
凡遇稱賀則臣庶皆集帳前無尊卑貴賤之辨執法官
厭其喧雜揮杖擊逐之去而復來者數次翰林承旨王
磐時兼太常卿慮將貽笑外國奏請立朝儀遂如其言
至元六年太保劉秉忠大司農博爾歡奉詔命趙秉溫

史杞訪前代知禮儀者肄習朝儀既而秉忠奏曰一人習之雖知之莫能行也得旨許用十人遂徵儒生周鐸劉允中尚文岳忱闕思義侯祐賢蕭琬徐汝嘉從亡金故老烏庫哩居貞完顏復昭完顏從愈葛從亮于伯儀及國子祭酒許衡太常卿徐世隆稽諸古典參以時宜沿情定制而肄習之百日而畢秉忠及翰林太常奏曰今朝儀既定請備執禮員有旨命丞相安圖大司農博爾歡擇蒙古宿衛士可習容止者二百餘人肄之期月至

七年二月奏以丙子觀禮前期一日布綿蕞於金帳殿
前帝及皇后臨觀於露階禮文悉無遺失是月立侍儀
司先是劉秉忠等奏請建官典朝儀帝命與尚書省論
定以聞至是以呼圖克濟蘇額森額為左右侍儀奉御
趙秉溫為禮部侍郎兼侍儀司事周鐸劉允中為左右
侍儀使尚文岳忱為左右直侍儀事關思義侯祐賢為
左右侍儀副使蕭琬徐汝嘉為僉左右侍儀事烏庫哩
居貞為承奉班都知完顏復昭為引進副使葛從亮為

侍儀署令于伯儀為尚衣局大使八年夏四月侍儀司
奏請制內外仗如歷代故事從之秋七月內外仗成遇
八月帝生日號曰聖壽聖節用朝儀自此始九年定受
宣勅官禮儀二十一年右丞相率百官奉玉冊玉寶上
尊號曰憲天體道仁文義武大光孝皇帝諸王百官朝
賀如朔旦儀順帝元統二年十月正內外官朝會儀班
次一依品從蘇天爵奏曰朝覲會同國家大體班制儀
式不可不肅夫九品分官所以著尊卑之序四方述職

所以同遠近之風蓋位序尊嚴則觀望隆重朝廷典憲莫大於斯邇年以來朝儀雖設版位品秩率越班行均為衣紫從五與正五雜居共曰服緋七品與六品齊列下至八品九品莫不皆然夫既踰越班制遂致行立不端因忘肅敬之心殊失朝儀之禮今後朝賀行禮聽讀詔赦先儘省部院臺正從二品衙門次諸司局院各驗職事散官叙列正從班次濟濟相讓與與而行如有踰越品秩差亂位叙者同失儀論以懲不恪庶幾貴賤有

章儀式不紊上尊朝廷之典禮下聳中外之觀瞻又馬祖
常曰百官朝見奏事古有朝儀今國家有天下百年典
章文物悉宜燦然光於前代況欽遇列聖文明之主如
科舉取士吏員降等之類屢復古制唯朝儀之典不講
而行使後世無以鑒觀則於國家太平禮樂之盛實為
闕遺且夫羣臣奏對之際御史執簡史官執筆縉紳佩
玉儼然左右則雖有懷奸利乞官賞者亦不敢公出諸
口如蒙聞奏命中書省會集文翰衙門官員究講參酌

古今之宜或三日二日一常朝則治道昭明生民之福也

明太祖洪武三年定朔望朝儀凡朔望日上皮弁服御奉天殿百官公服於丹墀東西對立俟引班引合班北面立再拜班首詣前同百官鞠躬唱某官臣某起居贊禮唱聖躬萬福班首平身復位同百官皆再拜引班引百官分班仍對立省府臺部官諸衙門有事奏者由西階陞殿奏事畢降自西階引班引百官以次出如無事

奏則侍儀由西階陞殿跪奏如之俟侍儀降階引班導

百官出

按洪武初凡早朝文官自左掖門入武官自右掖門入如華蓋殿朝至鹿頂外東西序立鳴鞭

訖守衛官至鹿頂內行禮訖就侍立位各衙門官以次行禮訖有事奏者入奏無事奏者四品以上及應陞殿者入殿內侍立五品以下官出至鹿頂外列班北向立候鳴鞭以次出如奉天殿俱朝於華蓋殿行禮奏事畢五品以下官詣丹墀依品級列班重行北向立四品以上及翰林院官給事中監察御史等官于中左右門伺候鳴鞭各詣殿內序立候退朝搥班以次出如先於奉天殿朝後却奏事者文武官於丹墀內依品級重行北向立候鳴鞭行禮訖四品以上及翰林院官給事中監察御史等官陞殿侍立五品以下仍前序立候謝恩見辭人員行禮訖鳴鞭搥班退有事奏者於十四年定奉天門或華蓋殿進奏無事奏者以次出

凡朔望日文武百官各具朝服俟鼓三嚴公侯一品二品官入東西角門俟其餘三品以下先於丹墀內班橫行序立鐘三鳴公侯一品二品以次入班序立鐘鳴畢儀禮司奏外辦導駕官導上位陞御座鳴鞭訖鳴贊唱班齊通贊詣中道班首臣某等起居聖躬萬福畢百官行五拜禮儀禮司奏禮畢而退十七年令百官凡遇朔望免行起居禮後更定朔望日上御奉天殿百官各具公服行禮常朝官序立於丹墀東西相向謝恩見辭官

序立於奉天門外北向候上陞座鳴鞭鴻臚寺贊排班
樂作常朝官行一拜三叩頭禮畢樂止復班鴻臚寺奏
謝恩見辭於奉天門外行五拜三叩頭禮畢鳴鞭駕興
二十二年令奉天殿常朝五府六部都察院通政司大
理寺錦衣衛等官於殿內侍立奏事止於華蓋殿二十
四年定侍班官員凡文武官除分詣文華殿啓事外如
遇陞殿各用履襪照依品級侍班有違越失儀者從監
察御史儀禮司糾劾東班則六部堂上官各部堂掌印

官都察院堂上官十三道掌印御史通政司大理寺太
常寺太儀寺應天府翰林院春坊光祿寺欽天監尚寶
司太醫院五軍斷事官及京縣官西班則五軍都督及
首領官錦衣衛指揮各衙堂印指揮給事中中書舍人
是年令禮部置百官朝班序牌大書品級列丹
墀左右木柵之上文武百官照品序立侍班令朝參
將軍先入近侍官員次之公侯駙馬伯又次之五府六
部又次之應天府及在京雜職官員又次之二十六年
令公侯序於文武班首次駙馬次伯自一品而下各照

品級文東武西依次序立風憲糾儀官居下朝北紀事
官居文武第一班之後稍近上便於觀聽不許攙越如
有奏事須要從班末行至御前跪奏不許於班內橫過
奏畢即便入班序立成祖永樂初令內閣官員侍朝立
在金臺東錦衣衛在西後移下貼御道東西對立至景帝景
泰三年令師保兼官品同者立班以衙門為次

景泰初定凡午

朝上御左順門先期內官設御座於左順門之北設案
稍南文武執事奏事等項官員俱於左掖門內伺候駕
出視朝各官照班次序立內閣并五府六部奏事官六
科侍班官俱於案西序立侍班御史二員序班二員序

軍四員俱於案南面北立鴻臚寺鳴贊一員於案東向
西立錦衣衛鴻臚寺堂上官於奏事官班以次面東立
管將軍官并侍衛官立於將軍之西五府六部等衙門
官照依衙門次第出班奏事通政司官照依常例引入
奏事三法司官遇有奏事俱隨班其常日答應內刑部
大理寺郎中等官各一員答應都察院侍班御史答應
其餘衙門官有事者分管答應鴻臚寺官贊奏事畢
徹案各官退各衙門如有機密重事許赴御前具奏英

宗天順三年奏准凡方面官入朝遞降京官一班序立

憲宗成化十四年令朝參官員遇鼓起時俱於左右掖
門外拱候東西班次照依衙門品級序其進士各照辦
事衙門次序立於見任官後凡糾舉失儀洪武初令百

官有未嫺禮儀新任及諸武臣聽侍儀司官每日於午門外演習御史二員監視有不如儀者糾舉百官入朝失儀者亦糾舉如律世宗嘉靖九年令常朝官叩頭畢內閣官於東陞錦衣衛官於西陞各以次陞立於寶座之東西錦衣衛官在司禮監官之南遇有欽差官及外國人等領勅翰林院詹事府左右春坊司經局堂上官輪流一人捧勅立於內閣官之後稍上候領勅官面辭捧勅官下立於御前候承旨訖由左陞而下循御道

邊行授與領勅官仍回至本班立神宗萬曆三年題准
常朝該日記注起居史官四員列於東班各科給事中
之上稍前以便觀聽四年議准五府都督官常朝班次
不當入候伯班仍照殿班立於錦衣衛官之後稍上待
錦衣衛堂上官詣金臺邊北司官於臺下各侍立仍與
南北司無執事官同班而序於其上十一年令於金水
橋邊增設序班三員北向站立俟東西兩班站定各於
班末熟視有回顧耳語咳嗽吐唾者即時糾舉其京堂

四品以上翰林院學士及領勅官俱不面糾十二年議令吉服朝參日期除祭祀齋戒不面糾外其餘照常糾儀又令叅將見朝在京營者照京官儀不贊跪在外者照外官儀贊跪失儀俱面糾

天子上公及諸侯卿大夫士等贊

臣等謹案杜典載天子以下執贊儀物上溯虞典五玉之文下及周記珪幣之制經傳所載三代典章約畧可見兩漢以降封建之制不行玉帛冠裳

非復五等來賓之義顧三公卿監以下聯班分等約以公侯卿士之遺法漢儀魏典往往得其一二焉第儀物不詳制度莫究所自漢氏之公卿執贄僅見於正會禮文援引所及未竟其言其稍可考者獨曹魏青龍二年高堂隆請時制畧擬周官尚存典則故杜典缺漢而著魏制自後茫然無可撫拾矣今按唐宋元明史志若會要典禮諸篇凡朝儀觀典皆無執贄明文不可強為附益故著其說

如右仍存其篇目以備考鏡

信節 宋 遼 金 元 明

臣等謹案杜典信節篇全錄周官掌節之文而以漢代銅虎符及符印使節諸名附注其下亦倣鄭注引漢制釋經之例也自周以後缺而不載今驗史志舊文若符璽制度當歸輿服徵發期會多屬兵家其實禮使節之條雖偶見旁文而不詳體制杜氏之刊落不載有以哉惟趙宋而後國信往來

鄰國之文頗著今約採其有補於賓禮者附著於後

宋神宗熙寧四年詔中外奉使除文臣兩省武臣橫行已上不以職務緊慢餘官如使外國接送伴體量安撫

制勘之類給奉使印餘給銅記以奉使朱記為名先是臣僚

差使不以官序高下職務慢緊例給奉使印而令式節文非劇司者記故密院有請也九年禮部

言政和令奉使官第二等以上給印餘給記差出者遇替移事故元借印記隨所在寄納本部歲終檢舉拘收

而寄納州縣占留給借無以防之乃詔有司立法應州縣寄納禮部印記非奉朝旨不許擅行給借

遼制有木契正面為陽背面為陰閤門喚仗則用之朝

賀之禮宣徽使請陽面木契下殿至於殿門以契授西

上閤門使云授契行勘勘契官聲喏跪受契舉手勘契

同俯伏興鞠躬

奏內外
勘契同

閤門使云准勅勘契行勘勘契

官執陰面木契聲喏平身立少退近後引聲云軍將門

仗官齊聲喏勘契官云內出喚仗木契一隻准勅付左

右金吾仗行勘勘契官云合不合門仗官云合凡再勘契
官云同不同門仗云同亦再勘契官近前鞠躬奏勘官
左金吾引駕仗勾畫都知某官某對御勘同平身少退
近後右手舉契云其契謹付閣門使進入閣門使引聲
喏門仗官下聲喏勘契官跪以契授閣門使上殿納契
宣徽使授契閣門使下殿奉勅喚仗其木箭之制內箭
為雄外箭為雌皇帝行幸則用之還宮勘箭官執雌箭
東上閣門使執雄箭如勘契之儀

金穆宗之世諸部長各刻信牌交互馳驛訊事擾人太祖定議自非穆宗之命擅制牌號者寘重法自是號令始一收國二年九月始制金牌後又有銀牌木牌之制蓋金牌以授萬戶銀牌以授明安木牌則穆昆佛寧所佩者也

元世祖中統三年賜夔州行省楊大淵金符十銀符十九賞麾下將士別給海青符二事有急速馳以上聞至元十五年追江南工匠官虎符八月中書省臣言近有

旨追諸路管民官所授金虎符其江南路臣宜仍所授從之閏十一月羅施鬼國西南番王並內附詔各為其地安撫使佩虎符十二月都掌蠻夷及其屬內附詔以其長為安撫使賜虎符餘授宣勅金銀符有差十九年勅出使人還不即以所給符上與有司不即收者皆罪之二十三年給金齒國使臣圓符二十八年南丹州莫國麟入覲授國麟安撫使三珠虎符成宗大德四年賜雲南王緬國十五驛驛給圓符四驛券二十

明太祖洪武十五年製使節黃色三簷寶蓋長二尺黃
紗袋籠之又置丹漆架一以節置其上使者受命則載
以行使歸則持之以復命二十三年詔考定使節之制
禮部奏漢光武時以竹為節柄長八尺其毛三重而黃
公紹韻會注漢節柄長三尺毛三重以旄牛為之詔從
三尺之制

欽定續通典卷七十一